

KUMPUAN
KHWATLANG NUN
SIAMTHAT

YMA AW



Central YMA-in a buatsaih Chhandamna Camping chu neih zawh a ni

Chanmari West, July 10: Ni 27th June atanga neih tan Ruihhlo ngaite leh Hmeichhe rabhi tleu tawhte tana Central YMA-in Chhandamna Camping Krista Hnungzuitute Tawngtai Bethel Camping Centre, Chawnpui-a a buatsaih chu nimin Inrinni khan neih zawh a ni.

Central YMA-in Kumpuan bawhzuina peng pakhat atana Camping a buatsaih ah hian Campers 498 (Mipa 392 leh Hmeichhia 106) an lut a ni. He Camping tanpui nan hian mi thahnemngai tam tak hnen atangin Camping tanpuina dawn a ni a, Central YMA chuan tanpuina petu zawng zawng chungah lawmthu a sawi. Aizawl khawpui chhung Branch YMA te thawhkhawm bakah heng ahnuai a mite hnen atang hian Camping tanpuina dawn a ni.

- | | |
|---|---------------|
| 1. Holy Cross Bakery, Tuikual North | - ` 10,000.00 |
| 2. T. Pachhinga, Tuikual | - ` 1,000.00 |
| 3. B. Vanlalruati, Mission Vengthlang | - ` 2,100.00 |
| 4. Dawrpui Kohhran Hmeichhia | - ` 18,016.00 |
| 5. Maxi Cab Owner's Association, Gen. Hqrs. | - ` 3,000.00 |
| 6. Central Kohhran Hmeichhe Committee | - ` 20,000.00 |
| 7. C.B. Thangluta Bawngkawn Chhimveng | - ` 1,000.00 |
| 8. Dawrpui Branch MHIP | - ` 10,000.00 |
| 9. Mosia Agency, Chanmari | - ` 10,000.00 |

Central YMA Thu leh Hla

Ni 4-5.7.2011 khan Regional Level Consultation with State Government and other stake holders meeting NEDFI House, Guwahati-ah neih a ni a, hetah hian Pu Vanlalruata, Asst. Secretary a kal a, hetah hian Sorkar Project ruahmanna leh enkawl naah tlawmngai pawlte thuk zawka inrawlh tura rawtna awm chu sawiho a ni. Tin, Planning Commission member hnenah Ramngaw leh Nungchate humhalha YMA te hmalak dan sawipui a ni bawk.

Ni 5.7.2011 khan Vaphai Village Council huamchhunga Saikumphaia ramdangmi dan lova Mizorama lo lutten khua an din, Tuipuiral Group YMA ten hmalakpui tura Central YMA-a an rawn thlen, Central YMA te pawhin Mizoram Sorkar-a hma la tura a ngen tawh chungchang sawihoin LAD Minister Office Chamber-ah meeting neih a ni a, hetah hian Pu Lalbiakzuala, Gen. Secretary leh Pu R. Lalngheta, Treasurer te an kal.

Ni 7th July, 2011 khan Central YMA hnuai Ruihhlo Do pawl CADS te chuan Heroin (No 4) Hawng 4 an man



Thlan lai
08.08.2011

Branch News

YMA Buk luah tur atana thlan Pu Lalngaihawma te chuan Ni 6.7.2011 (Nilaini) khan an luah fel ta.

Naktuk Thawhtan zingkar hian Branch YMA chuan Zawlbuk sak mekah hnatlang a ko va, he hnatlangah hian Section tin atangin member 25 aia tlemlo thawkhawm theuh turin a ngen a ni. Balu leh Rawra thiar tur a ni e.

Tun hnai hian kan vengin chhiat kan tawh zin deuh avangin YMA hruaitute leh memberte lumen, thlanlah leh khawharin kal ah tan la thar zel turin Branch YMA chuan a ngen tak meuh meuh a ni.

Vanapa Section Bungraw In leh Transformer awmna bul ram ruak chu Revenue Department te nen Land lease nei tura hmalain tihfel a ni ta.

LUSUN KHAHWAR

Pi Darthangpuii Sailo (67) M/o Vanlalhriata K-Section leh Pi Thanchhungi (48) W/o C. Lalngihllova T-Section te chuan Ni 7.7.2011 leh Pi Chhingtei (90) W/o Tlangliana (L) T-Section chuan Ni 9.7.2011 khan min boralsan a, an kalsan tak an fate leh chhungte Chanmari West Branch YMA chuan a tuarpui takzet a ni.

July - September thla chhunga Branch OB-te Incharge na tur hetiang hian siam a ni :-

- Pu R. Lalhmachhuana, Vice President
- *Chawngbawla Section*
- Pu C. Lalzarliana, Treasurer
- *Khuangchera Section*
- Pu Lalthuamluaia, Fin. Secretary
- *Neuva Section*
- Pu K. Darthantluanga, Asst. Secretary
- *Taitesena Section*
- Pu RL. Thanhnuana, Secretary
- *Vanapa Section*



TUN KAR CHANGVAWN

Chutichuan mi fing lote anga awm
| lovin mi finge anga awm zawkin, in
| awm danah fimkhur rawh u; nite hi
| a that loh avangin remchannate lei
| zel rawh u. Ephesi 5:15-16

Editorial Board

Editor

RK.Rozidinga
9436142304

Joint Editor :

RK. Malsawmkima
9862578441

News Editor

Tv. Thangkuma
9862303135
Pu Vanlalhluta
9862366308

Tv. Vanlalfawna
9856301975

Cir. Manager

Johny Lalthanpuia
9612359161
Jacob Lalrinsanga
9612319779

Production

Manager
R.Lalmachhuana
9436151817

Branch Office Bearer

President

T.Ngurkhuma
9436190843

Vice President

R.Lalmachhuana
9436151817

Secretary

RL.Thanhnuna
9436152760

Asst. Secretary

K.Darthanthuanga
9436196071

Treasurer

C.Lalzarliana
9436142049

Fin.Secretary

Lalthuamluaia
9612216649

Advisers

Pi Zamanthangi
Pu Vanlalsawma
Pu Rothuama
Pu Lalbiakthanga
Khiangte

Nang erawh chu engkimah fimkhur la, hrehawm tuar la, Chanchin Tha hriltu lam hna thawk la, i rawngbawlna kha hlen rawh. II Tim 4:5

Editorial : Tunlaiin kan vengchhungah thihna a thleng ta zeuh zeuh reng mai a. Heng thihnate hi kan duh reng vang leh tha kan tih reng vang a ni hauh lo, amaherawhchu kan sawisel theih loh leh keimahni chung theuhva lo thleng tura Pathian ruat a ni tih kan pawm vekin a rinawm.

Thihna a lo thlen hian hengte hi a ken tel thin fo thenkhatah lumen ngai, thenkhatah lumen ngai lo te a ni nawk thin. Kan sawiin kan ziak fo tawh a, mahse kan la vei chhunzawm zel a ni ang, rilruah a lut lo thei lo. Tun hnaiah Lumen ngai kan nei ta zeuh zeuh mai a, tleirawl/rawlthar tlawmngai leh thahnemngai tak tak a rawn chhuak kan tam thin hle hi chu vengdangin min awt thei thin hle a ni. Heng ang hun remchang la a mipa tlangval hre tan ve tawh mithi-in bawr vela tei hawi mai mai leh chhungte bula tlaivar tur anga chhuak ve si mitthi in a lut miah lova achunga kan sawi a bul vela lo tawi mai mai kan tam ta lutuk hi chu thil tha lo tak a ni ngei mai. Nu leh pate'n kan fate dinhmun theuh i chian leh theuh teh ang u. Kan hmuh phak lohah hian eng ang chiahin nge an khawsak tih hi in zawt theuh ila. Hetiang ang renga kan fate an kal chuan an tan a tha lova Chanmari West khawtlang tan pawh thil tha a ni hauh lovang tih hi nu leh pa ten i hre thar leh theuh ang u.

Tin, heng bakah hian tlaivar zanah nula tlangval kan la kal tlai mah mah. Nge kan chhuak hma a kan thleng har tih pawh hi in enchian kan la ngai fo mai. Dar 10 hnulama kan lut tliar tliar fo mai hi a khamawm viau lo maw nu leh pa chaweikham atanga lo thu tawh te tan. Thlanlaih na lamah nise tlawmngaihna kan tlachham tan ta hle niin a lang bawk. Kan ai u zawk te an luh sek laia khawilai emawa zial lo zu khawm leh lo ti ti let let lah bo lo. I sim deih teh ang u khai. YMA membrete heng kawngah te hian taima lehzualin ke pen i tum theuh teh ang u.

Article : HIV & AIDS engtingge ni ang?

- C.Lalramzauva (Tete-a)

Kum 2000 hmalam kha chuan HIV/AIDS awareness chu inhlawhna leh sum siamna tha tak, AIDS vei/HIV+ve te chu sapram lama natna, khirkhkan tak leh tihdamna awm lo zofate tan chuan hlauhawmna em em pawh nei chuanglo niin kan hria a, he lam buaipui a thawk NGO te chu, sum um vang leh sum siamna tha ni in kan ngai mai thin a nih kha. Engpawhnise, kan lo hmelhriat tawh dan lam chu kan chhui zui lemlo ang a, amaherawhchu, vawiina ka han thai lan ve leh nachhan chu tunhma lama kan lo ral thlir natna khirkh tak tihdamna awmlo ruihhlo ngaite leh mipat hmeichhiata awm eu te natna vei thin tih ngawt kha a ni satliah tawh lova. Kan vengchhungah meuh pawh kutchang thliak a chhiarsen loh kan lo awm ve ta a, mi tam takin kan inchungah ngei (hre reng chung emaw hre lemlo pawhin a ni awm e.) kan chenpuuin kan mutpui ve reng hlawm ta a ni.

HIV & AIDS langsarlo taka mizote eiral mektu: Kum 1990 October thla atang khan mizoten HIV pai kan awm kan inhrechhuak tan a, kha hun atang khan vawiin ni thlengin kan ramah min thutchilhin zofate min suat ta zel a. MSACS record a a landan chuan kiam lam aiin punbelh lam hi a la ni ta zel lehngal a. May 2011 thleng a HIV hrik pai leh pailoh in test te chu mi 1,48,982 lai an ni tawh a, chung zinga mi 5,782 te chuan HIV hrik an pai (HIV positive) a ni tih hmuhchhuah a ni a, AIDS avangin mi 216 te phei chuan an nunna an chan tawh nghe nghe a. Mipat hmeichhiatna hman avang ringawtin mi 1,712 in an kai a. May thla bik a thisen test zat hi mi 4,742 an ni a, chung zingah chuan mi 132 hrik pai thar hmuihchhuah an ni. May thla chungin ni 31 a awm a, chuti anih chuan nitin mi 4 chuangin HIV hrik an kai mek zel thihna a ni. Tin, HIV hrik pai thi tam tak te hi natna hmingdang (entirnan; septicimia, TB etc) hian an thi na sa hle a heng vang te pawh hi a ni ang AIDS avanga thi tih record hi a san lutuk lem loh. Hetianga Record/Statistic han en mai hi chuan kan la tam lutuk lo ve te pawh a tih theih awm e. Amaherawhchu, zir mite chuan HIV hrik pai 1 hian a dam chungin a vel ah mi 10 tal a kai darh thin tiin an chhut a. Hei vang hian kan dinhmun hi a ralti hle a, chuangin, HIV & AIDS hi langsarlo taka mizote min eiral mektu a ni tih chu kan chhut thiam awm e.

Enge HIV & AIDS chu: kan hre theuh tho chuan a rinawm a, mahse tawite in kan sawi nawn lawk ang, HIV chu hrik te tak te mit lawnga hmuh tham loh mihring thisena natna hrik dodaltu thisen sipai eichhetu a ni. HIV hrik paite hi HIV positive tiin an sawi bawk. AIDS chu HIV

hrikin thisena natna hrik dodaltu thisen sipai a eichhiat viau tawh hnua zalen taka mihringa natna hrik lo lutin natna a rawn thlen, tihdam sen loh khawpa natna / tihdam hleihtheih tawhloh a natna hrang hrang an lo kai thin hi a ni. Tichuan HIV leh AIDS tih chu thil thuhmun reng a lang si mahse hrang si a ni. HIV hi boruaka hrileng a ni lo a, boruakah a darh thei lova, ruang kil, lumen, inlenpui atangin kai theih a ni lo a, mihring taksa lumah chuah a awm thei a ni tih hi a tawi thei ang bera sawifiahna a ni awm e.

A Inkaichhawn dan thlangpui: Mipat hmeichhiatna (sex), Inchiuna hriau thianghlimlo inhman tawm (blade te pawh a huam tih hria ila), thisen thianghlimlo inpekchhawn (pem/kak atanga midang thisen thianghlimlo kai te pawh a huam), nu HIV hrik paiin a naupaiah a kai chhawng thei bawk. Heng bak atanga inkaichhawn hi vawiin thlengin khawvelah hmuchhuah a la ni lo. Heng a kaichhawna kan han sawi atang hian a kai loh theih dan leh kan him theih dan chu ziah lan ngai lovin kan hre thei theuh mai awm e.

Tlangkawmna: HIV & AIDS chungchang hi tumkhat a ziah zawh sen rual anih loh avangin tun tum atan chuan a hmawr kan sik pilh hlek chauhvah ngai mai l la. ka han tarlan duh ber zawk erawh chu kan vengah hian he natna hi a khual ta lutuk bik lo e tih hi a ni. Chuangin, nasa zawkin helam hi kan buaipui a, kan thangtharte tan a veng nuam leh him kan siam theih nan a hma kan lak takzet hi a ngai ta a ni lawm ni? Tih hi a ni.

(Kan ngenna ngaipawimawha thu bengvarthlak tak min rawn ziah sak avangin Pu Tetea i chungah kan lawm takzet e.)

VANAPA

☞ An member Nl.Kitty Laltnanmawii, Durtlang Presby. Hospital-a awm leh Pi Tha-i w/o Pu Mawizuala, Greenwood Hospital-a awm mek te an dam leh thuai an duhsak.

☞ Ningani zan khan Pu Lalzawmliana te in ah Section Committee neih a ni.

☞ OB incharge atan Pu RL.Thanhnuna July-September atan Branch in a ruat chu lawmawm an ti hle.

☞ Section chhungah Ran vulh thlahdah mi tlemte kan la awm a, thenawm khawveng tan a hnawksak hle. Tin, khawlaiah ui ek hmuh tur a la awm reng bawk a. Mahni ran vulh te khuahkhirh turin an in ngen.

☞ Chhiatni Fund ` 50,500/- thehluh fel a ni a, ` 2,700/- in beisei zat khum a ni.

☞ Property In-charge te tanlak na zarah Bungrua changtlung taka enkawl chhoha tanlak mek a ni.

☞ Neuva Section hruaitute nen Ni 16.7.2011 khian Football Friendly Match neih tum a ni.

KHUANGCHERA

☞ Hunawl remchang zingkarah Lei laiin an hnatlang thin a, inhlawhna siamsaktu Pi Kimi (T-Section) chungah lawmthu an sawi a. Heng hnatlang neih ah hian memberte zingah kum lama Upa tak tak ten an telpui thin chu an lawm hle. Hnatlang thin zawng zawng chungah lawmthu an sawi bawk.

☞ Vengchungah awm thar turten Pem Lehkha dik leh felfai tak an nei ngei tur a ni a. Khawtlung duh loh zawng ti thin te Pem Lehkha in a chhanhim lo tih an hriattir.

☞ Pi Darthangpuii Sailo (67) chuan Ni 7.7.2011 chahnu lam khan Ashtma natna avangin a boral a, a kalsan tak a tu leh fate an turpui hle.

TAITESENA

☞ Vengchungah chhiattawk kan awm changin hruaitute thlanlah lama tan la thar turin an in ngen.

☞ Tunkar kalta a Section Committee neih an tum chu, vengchungah chhiattawk an awm avangin thulh a ni a, rokhawlhna dang a awm loh chuan tunkar lo awm tur hun remchangah committee neih tum a ni a, hruaitute hunawl lo insiam turin an in ngen.

NEUVA

☞ An hruaitu Pu K.Lalchullova te chhungin a nupui Pi Lalmalsawmi Sailo hriatrengnan Section tan Gas Stove (Two burner) tha tak mai a rawn pe a, an chungah lawmthu an sawi takzet.

☞ Ni 16.7.2011 (Inrinni) zing dar 7:30 khian High Field-ah hruaitute Football Friendly Match Vanapa Section hruaitute nen neih tur a ni a, hruaitute kim taka kal theuh tur leh he hunah hian ` 50/- aia tlemlo ken theuh tur a ni tih an inhriattir.

☞ Tunkar lo awm tur Inrinni (16.7) hian bungraw enfel, Gas Stove dahna siam leh tul ang siama hnatlang koh tum a ni.

☞ Zuangtuikhur leh a bulhnaia inbual, insu leh lirthei sil thin an la awm fo mai chu an ngaimawhin kawngpuia tui luang huh reng pawh an ning hle a, ti tawh lo turin an in ngen. Pathianni-a kawngpuia motor sil thin pawh ti tawh lo turin an ngen bawk.

☞ Section Project a hlawhtlin theihnana hruaitu Talent Ip an siam atangin ` 5,000/- lai hmuh a ni chu lawmawm an ti hle.

☞ Section-in khuapui leh khuangte an neih chu a that tawh loh avangin mi inphal section tana khuang pe duh tan pek theih reng a ni e.

☞ Pi Thanghliri Bethesda damdawiin-a awm leh Section pa tlawmngai Pu K.Lalchhuanawma accident vanga damdawiin a awm mek te an dam leh thuai an duhsak.

ZCC NEWS

☞ Ni 8.7.2011 zan khan Hermon Children's Home tlawh a ni a, member 70 zet an kal thei, lirthei thawhtu Ni. R. Lalramengzami, Pu Lalhmachhuana, Pu F. Zosanga, Pu Zothangzuala Chhangte leh Pu Rohmingthanga te chungah lawmthu an sawi a, Hermon Children's Home tlawhna atana vengchung mi thilpek pe tute zawng zawng chungah lawmthu an sawi. Home tlawhna-ah hian Buhfai Bag 4, thuamhnaw leh pawisa fai ` 21,800/- leh Club pawisa ` 10,000/- a vaiin ` 31,800/- hlan a ni.

He hunah hian Programme hlimawm tak tak hman a ni a, hnam lam chi thum entir bawk a ni.

☞ Ni 5.7.2011 zan khan Assam Rifles-ah hnam lam entir a ni a, member 29 an thawkchhuak.

☞ Karleh hun remchangah Committee koh tum a ni.

LOCAL COUNCIL NEWS

☞ NLUP Chanmari West-ah 1st Instalment sem tan mek zel a ni . Heng Department Horticulture, Fisheries leh Vety atangin pek a ni tawh a, Trade hrang hrang atanga pawisa dawnte training pek a nih tawh angin Implementing board in a rawn endik dawn a, diktaka hmanglo te chu Inplemting board in a report ang.

☞ Chanmari West Kawipui to Vaivakawn Road kawngpui kama PHE tui pipe leak reng chu siamthat vek tum a ni a, a leak na lai kawngpui pawh nise laihchhiat theih a ni. Laih chhiat ngai a nih chuan Local Council Chaiman hriattir tura ngen kan ni e.

CWSC NEWS**Volleyball Sub-Committee :-**

☞ Wawiin tlai dar 3 ah hian Indoor Stadium TT Hall-ah players te hnena lawmman semna hun hman tur a ni a, players te kimtaka kal khawm turin an in ngen a, hruaitu phei chu kim taka kal ngei turin an in hriattir. Meeting neih nghal tur a ni bawk ang.

☞ Season Opening Tournament khelh zawh takah CWSC Volleyball Club te chuan Final-ah Josua Memorial Volleyball Club te 3-2 a hnehin an champion.

Football Sub-Committee :-

☞ Ni 6.7.2011 (Nilaini) zingkar khan Volleyball Sub-Committee te nen Football Friendly Match an khel a, he inkhelhah hian a vannei zawk ah tangin si 3 si 2 in an chak a, tlaiah chawhlui tuihnai tak kilho nghal a ni.

☞ Volleyball Sub-Committee te nena inkhelh ah khan Jersey kimlo a la awm a, la dah lo, lo kawl kan awm a nih chuan aranglam in Pu R.Lalsangzuala hnenah dah tur a ni e.

MHIP NEWS

☞ Chanmari West Branch MHIP te chuan MHIP Day vawi 37-na chu Ni 6.7.2011 (Nilaini) khan Chanmari West Primary School-ah hun hlimawm tak an hmang a. MHIP te chuan he hun hmanpui tura an sawm ten an ngaih pawimawhsak avangin an cungah an lawm hle a ni.

☞ An Executive Committee Member Pi Thanchhungi W/o C. Lalngilhlova, Taitesena Section a mi chuan Ni.7.7.2011 khan a boral san a, a kalsan tak a pasal fanau te MHIP Chanmari West Branch-chuan an tawrhpu tak zet zet a ni. Pathian-in awmpui zel se an ti.

'SAPHUN'

chungchang bihchianna leh hriattur pawimawhte

Eng hnam nge kan nih a, chutah chuan eng 'chi' nge kan nih? tih atang hian i han chhui dawn teh ang. Mizo tawngah hi chuan 'hnam' kan tih mai hian a hnuai sap tawnga chi peng leh hnam sawina te hi kan huam tel tir mai thin, a sap tawng zawng a sawi chuan a dikin a fel phian leh nghal a, chungte chu - Community, race, clan, sub clan, tribe/caste tiin. Mizo hnahthlak zawng zawng hi Mizo kan ni mai tih hian tawngkam leh ziak dan duhtui thar a ngai. Chuti lo chu Mizo hnam pawhsawpna leh riralna hial pawh he thu mal 'hnam' tih leh 'chi' tih hian a keng tel thei tlat.

Hnamdang mi (a bik takin vai kan tih ten) mizo nupui nei hian 'sa' ka 'phun' ti tein emaw an nupui ten chutiang chuan an tih tir chawk thin. Chutiang chuan Sailo, Ralte etc. emaw te an inti ve ringawt thin. Khawtlangah pawh misual tak an nih loh phei chuan chumi leh an thlahte thleng pawhin khawtual mi ang maiin kan ngai hial thin, chu bakah mizo hmingte in phuahin, YMA leh V.C/L.C te pawn an lo pawmpui leh ta mai bawh thin niin a lang. He thil hi thil theih miah loh leh thil pawh tak thlen thei thil a nih avang hian bihchian a tul hle a ni. Mizo hi mipa lama chi kal kan ni a, hnam dangte pawh an ni tlangpui, Khasi tih loh chu. Mizo pa fate chu Mizo an ni reng anga, chutiang bawkin vai fa chu vai a nih reng a ngai.

Duh ang anga tribal nih ve ngawt hi thil theih a ni miah lo. Kan hriat tur pawimawh em em chu Tribal nihna pe thei tu chu **President of India** chauh hi a ni. Tichuan vai (general people) te hian mizo hnamah 'sa' lo 'phun' thei ta sela tribal an lo ni ve zel dawn tih na a lo ni ta a. A nghawng chu hnam dalna/ralna mai chauh a ni. **Hnam dang vai / sap kan tih te hian engtik lai mahin emaw eng vang mahin Mizo hnam ah 'sa' anrawn phun thei lo.**

Saphun kan tih hi a awmzia leh 'sa' hi engtianga 'phun' tur nge tih kan hriat a pawimawh ta a ni. Saphun tih awmzia chu "hmanlaiin Mizo zingah hnam hrang hrangin 'sa' biak dan an nei hrang vek a. Miin a hnam kalsan a, hnam dang sa biak zawm tur leh an hnam vuan tura va intulut hi 'saphun' a ni. Chutiang midang 'sa' va phuntu chuan a 'sa' chu a va be ve ta a, chubakah hnam nihna pawh a vuan tel tihna a ni". Saphun dan hi chi hrang hrang pali (4) a awm a, chungte chu- Fahrah nih vanga saphun te, Laina siam nana saphun te, chak loh zawk vanga saphun te leh fa dam thei lo tena fa an lo neih a an fate an lo dam nana saphun te a ni. 'Saphun' tur chuan hei hi hriat a ngai a ni. Mi tupawhin mi dang sa a phun dawn chuan sa phuntu leh a phunna tur remtih

tawwna a ngai a ni. Chutianga sa a va phun tawh chuan a va phunna chhungkuate chi leh kuang nihna a lo nei ta a ni. Mizo chi peng chhungah chauh 'sa' hi 'phun' theih a ni. Entirman, Fanai in Sailo hnamah Pachuau-in Tochwawngah tih ang vel lo chuan 'saphun' hi a theih loh. 'Saphun' hi hnam (community) inkarah a theih loh tihna a nih chu. Vai emaw sap in emaw mizo hnam (community) -ah 'sa' a 'phun' ngawt thei lo. Chutiang mi chu a nupui pawh Mizo lo ni raw sek sek, amah leh a fate (fanu te chuan mizo mipa pasal-a an neih chuan thu hran.) thlah kal zel chu engtikah mah Mizo nih theihna an tan a awm lo. Saphun hi a tu lam lam pawhin an ti chat thei a ni.

Hnam dang entirman vai ho hi 'sa' lo 'phun' tir ta zel mai ila chu nakinah chuan Mizo hnam bo-na mai tur a lo ni dawn a ni. An sumdawn duhna vang ringawt te hian 'sa' lo 'phun' tir mai ila, hlawkna an tel anga, tribal certificate te hial an lo neih phei chuan thil finthlak tak chu a ni lo ve ngawt ang.

Tunlai hian Lal awpna hnuai ah kan awm tawh lova, engtin nge sa hi lo phun duh ila kan tih tak ang? tih hi zawh na awm thei a ni awm e. Hemi a nih avang hian hnam dangin Mizo-ah sa a phun thei tawh tihna lam a kawh lo. Miin sa a phun duh chuan heti hian a ti tur a ni- Court-in a a pawmtlak thlap 'Affidavit' siamin chhia a chham anga, chu Affidavit chu Mizoram 'Official Gazette'-a chhuahtir leh a nihin dan mitah a tling zo chauh a ni. Chutianga a tih zawh chuan Sailo chu Ralte emaw Pachuau emaw Khiangte etc. ah sa a phun a, chutiang hnam anga chhal a lo ni dawn tawh tihna a ni.

Saphun dan hi tu tana pawimawh nge kan tih chuan Village Council/ Local Council te hi an ni. Anni hi Deputy Commissioner-in Tribal Certificate leh Residential Certificate a pek hma-a lo finfiahtu te an nih vang a ni. Mizoram hian Mizo nilo hnam dang Tribal leh Residential Certificate nei an awm nual tawh. Mipain hnam dang mi nupui atana a neih chuan a nupui leh fanaute a sa leh khua chu an tawmpuiin

HETAH HIAN SMS LA

>>9774170328<<

Vanapa Section a mi Silai nena Sava leh Chepa te veh thin khan sim hmak teh, a changkan loh thlak em mai. Tunlaih min humhalh tuma theihtawpa hma an lak laia, ti chereu zawnga lo khawsak zawng, a hmasawn lo zia em mai.

986235_37

V-Section-a Ui vulh ho khan in ui ek kha in thian peih lo a nih chuan chhuah tawh lo hram teh u. Kawngdunga ui ek awm thluah mai hi a dik lo in a mawi lo hle a ni.

977437_16

Vengchhungah 'Zu' rui bengchheng thawm hriattur a va tam leh ta ve. Kumpulan hruaitute an va ngaihawm thin ve le.

961231_79

Vengdangin an tih ang hian Gas sem dan tur YMAAW ah hian Local Council ten an tarlang thei ve lawm ni.

943619_20

(SMS kan dawn te hi Ed. Bd ngaihdan a ni vek kher lo)

HEI LE LIMBU TUI

Limbu Tui fir tha tak engemawchen kan khaihlahk hnuin kan nei leh ta e, min dawr thin tute min han dawr leh teh u. Man tlawmtein kan pe chhuak leh ta chur chur e.

*VL.Chhunga, T-Section
Ph:9862926173*

a fate phei chuan a chi an pu hlen tawh dawn a, Supreme Court chuan inneihna avangin hmeichhia chuan tribal nihna a nei thei a, mipa erawh chuan a pian leh murna chi avang chauh lo chuan a nei thei lo a ti a ni.

Hmeichhiain hnam dang tribal nilo pasal a neih chuan an inkara an fate chuan an pa sa leh khua an zawm a ngai dawn ta a lo ni a, chungte tan chuan ILP an neih a lo ngai dawn reng a ni. Tin, Mizorama hna zawm chung changah leh zirna chungchangah thleng pawhin Mizo tribal-te hamthatna dawn ang hi an dawng ve thei lo a ni. Heng Post Metric Scholarship leh tribal nih vanga reservation leh kum lama relaxation te hi an neih ve a thianga lo a ni. Hnam dang mi tribal nilo pasala nei ngam chuan khawtlang nun leh Mizoram dinhmun ngaihtuah reng chungin an fate pawh an pate nihna put tir ngam te pawh hi a hun ta hle mai. Inneih tawh hnu a fate Mizo nih tir tum viau mai hi Mizoram leh Mizote chi tih dalna hmanrua mai a ni tih kan hriat a tha hle mai.